

四庫全書

集部

欽定四庫全書

集部

倪文僊集卷二十七

詳校官庶吉士_臣陳若霖

中書_臣劉源溥覆勘

總校官檢討_臣何思鈞

校對官中書_臣汪學金

謄錄監生_臣費元震

欽定四庫全書

倪文僖集卷二十七

明 倪謙 撰

墓表

奉政大夫廣東按察司僉事顧公墓表

成化七年辛卯三月三日廣東按察司僉事顧公以疾卒公無嗣其兄倫弟信卜以是年九月二十八日祔葬公吳縣楊寶山祖塋奉雲南大理知府丁太初所述行

實乞予文以表於墓按公諱儼字廷望姓顧氏曾祖泰祖至善封中書舍人父叔恭中永樂乙未乙榜任河南淇縣教諭母張氏季父叔謙任禮部精膳主事公之先蘇之吳縣人洪武中中書以富室徙京師因家金陵公幼負美質器宇魁梧有志于學早從里中師遊輒能詩賦工書法若老成人人皆竒之既長侍主事公京師從翰林侍讀學士士謙張先生學學大進累試京闈不偶乃歸教授鄉里遠近來學者屢滿戶外正統戊辰巡按

御史齊公聞其賢以經明行修薦于朝召試優等授嘉興縣學訓導教人有法士多成就登名甲科景泰乙亥丁內艱服闋至京適朝廷選儒臣以充臺憲公與焉拜陝西道監察御史以績最賜勅命階文林郎贈教諭公如公官母室皆孺人公持廉秉正糾擊不避人嚴憚之嘗巡視京倉善於立法盜息弊革奉勅清理福建軍政邊軍多有以詭名來擾者逮繫妻孥隣里累年不絕公究得其實罪其姦而雪其誣民始獲安沙汀民叛賊殺

不辜公偕鎮守內臣領兵抵其境誅其首惡餘黨悉平
還朝陞廣東按察司僉事時廣賊方熾公至即往高雷
諸處招撫叛民新會楊江有賊數萬總戎趙公輔檄公
勦之公提兵五千直擣賊巢斬首千餘級追復被擄男
婦千餘人牛馬什器無算總戎上其功蒙朝廷銀器采
段之賜公在軍中不解甲者累月冒矢石犯霜露以勞
致疾乞歸田里遂致仕還吳中公性孝友早喪父迎母
就養官舍奉侍甚備少嘗鞠於伯父賢伯父卒無嗣每

思及輒悲泣主事公嘗遘疾幾危公剗股煮液以進遂
愈公兄弟三人極相親愛無間爾汝交友以信義相與
所得俸賚輒以賑施故舊賓客晚結屋城東時會鄉耆
故友燕談為樂或携尊出遊登山臨水把酒賦詩澹然
忘歸世事一不以掛懷抱人皆高之卒年五十有五生
於永樂丁酉十月二十七日配張氏生女一適梧州知
府徐汝暘之子吳庠生楷以兄子鎮為後嗚呼仕無所
苟者君子所守之正用無所局者君子所蘊之備也苟

馬而仕則知進而不知退局馬而用則優此而短於彼
又何足尚也哉廷望之為儒臣也以薦為憲臬也以選
以勞休致也以疾仕無所苟如此守之正也可尚已司
教則能以善淑人司憲則能以法繩姦以武戡暴用無
所局如此其蘊之備又可尚已所可惜者用未究而遽
退年未耄而遽止祀未續而遽尼得不重昆弟宗族鄉
黨之哀也耶使無是石以紀其德履之祥而垂之無窮
將恐百世之下有不得以考而知矣故為之表

故竹隱盧公暨妻包孺人墓表

封兵部主事愛竹翁喪其父竹隱公母包於姑蘇權厝
淺土景泰甲戌始得吉壤於吳縣橫路橋側彭華鄉之
原亟欲歸葬屬有疾乃命其子鄉進士雍還吳以是年
二月八日合葬焉予嘗為銘以誌其墓矣今成化甲午
雍為福建布政司左叅議丁父愛竹翁憂展墓於鄉追
思祖德欲立石以表于墓以予親契甚厚知其家世為
詳復以文見屬予義不容以不敏辭乃為之表曰竹隱

公諱成甫字文義姓盧氏吳之舊族也曾祖榮祖名俱有隱德父鑑國初知福州永福縣廉勤惠愛遺德在人公丰儀秀麗廣額脩髯器宇不凡人望而敬之孝于父母篤於學業有志用世會永福府君歿獨任家事遂隱不出以永福號竹軒因號竹隱閒居以經史自娛雖佛老醫卜之書亦皆博涉好蓄古法書名畫縉紳多與交往至輒出求賞鑒所得評跋翰墨為多臨財廉介無所苟取有傭者劓地後圃得金數餅以獻公曰爾所自得

何預我為悉推與之有司聞公賢舉為里正公剛直無
所徇徇有爭訟者不赴有司而赴愬於公公為剖析是
非莫不信服委督區賦民相戒曰不可以吾輩事累長
者率爭先完納無敢後鄉飲延為大賓公儀度有容觀
者歆慕歲荒民乏食公極力區畫以賑給之賴以全活
民感其德相率圖公像於神祠事之子清附籍南京時
迎公就養公至雍方五六歲公愛之抱置膝上拊之曰
汝父甚孝幼年時官府督匠急家人皆避匿汝父獨挺

身出見官被捶楚不少怨母病焚臂香以禱其孝如此
汝能如汝父之孝可也見雍秀異教以篤事詩書曰亢
吾家者必此孫也今果如其言惜公不及見也包孺人
同里著姓唐集賢學士融之後諱妙音端重貞靜動循
儀則事舅姑以孝姑歿居喪哀毀歲時奉祀皆躬執其
勞治家有法待宗姻撫卑幼咸得其宜一旦遭疾召諸
子婦訓之曰居家以和睦為本慎勿多言構非以生離
間吾死無憾又曰聞孫雍讀書有進宜遺書勉以忠孝

大節可也公之卒在宣德壬子二月十八日享年六十
有六其生為元至正丁未九月六日孺人之卒在正統
辛酉三月十一日享年七十有六其生與公同年之十
月二十日生四男三女十孫男二曾孫嗚呼詩書之族
所以彌久彌昌者由世德之積也故德厚者流光德薄
者流卑一自然之道也盧氏之先世德相承者久至永
福則推以及於一邑竹隱又推以及於一鄉積之厚矣
故其流澤至廷佐之身而始發策名進士歷官大藩有

為有守廉稱焯著用致貤恩於親父子顯榮光昭前烈
況其德業之建名位之隆日進未已則貤恩於祖又可
待矣子用是表之於墓使人知盧氏流光於後者實厚
德之報也夫豈偶然之故也哉是為表

明故前奉政大夫湖廣按察司僉事成公墓表

天順癸未三月初五日予同年友錫山成公敬之以疾
卒於鄉春秋六十有一既葬邑之某山某原十有二年
矣其季子邑庠生約今秋來應京闈鄉試謁予以墓表

為請予嘗記公歿後其伯子繪以教官守制起復來京
知公與予同年契厚求為輓詩序屬調官赴任期迫不
能待而去今余心缺然則斯請也敢不為一述以償其
伯季意乎公諱始終敬之其字也姓成氏別號澹菴曾
祖榮七祖玉山父彥文俱隱德弗曜母夏氏以永樂癸
未九月十八日生公丰神秀異長身美髯巍然不羣髫
鬣時日記千言過目不忘比長六經子史無不通貫又
解音律多藝能攻舉子業以資進取深於理趣以儒士

應宣德乙卯鄉試中式登正統己未進士第觀政內臺
拜大行人使陝右禁茶又使賫經於楚蜀所至咨詢民
瘼凡道途所經古人陳跡及名區勝境輒形賦詠語意
溫雅力追古作襟度灑如也風憲缺詔銓司遴選擢公
河南道監察御史時朝廷方重軍伍選御史優於材畧
者十二人分巡天下以理之公居第一俾清軍政於四
川比至播叙諸州苗寇叛逆勅督官軍策應兵部尚書
靖遠伯王驥深入寇境擒除黨類築城叙州選練士卒

守禦民賴保全還朝北兵犯邊復勅領兵紫荆關策應
會昌伯孫忠敵悉遁去還陞湖廣按察司僉事敏於疏
決獄無繫囚臬事有未當者多所舉明以直言為當道
所忌休官還家怡情泉石畧不以得失掛懷抱結屋數
楹如舟名曰錦江舲以示知止之戒又作海嶽軒於橫
山別墅花竹環繞分泉注於軒前名曰導泉暇則枕流
漱石詠歌不輟以自樂所著有澹菴文集金匱理筌紀
行集澹菴詩集行于世配杜氏虞氏子男二長繪任教

諭次約性女二劉清臣馮泰時其壻也孫男二嗚呼君子抱道於已而致用於時固思以濟乎民物也然時之所遇則有通有塞一惟順理以安之而道之全於我者自若也是以進退用舍無與於已其囂囂自得抑何往而不樂哉吾友敬之學博而材清志高而氣直早有得於聖賢之道一旦由科第出以効用賢勞使職肅清憲度兼優武畧叅預戎機道已及於民物矣抑且見幾知止拂袖而歸開幽曠之軒亭樂林泉之雅趣置利祿於

土苴寓情性於篇什是則萬鍾何加一簞何陋其高風
遠度豈不真知輕重大丈夫哉雖其材未盡施壽未盡
享若有不足然所以遺於子孫者則有餘矣況其文章
之瑰竒常存光燄於世乎予故為述其行藏之槩於墓
石後有聞公之風而致夫懷仰者未必不有徵於斯文
也是為表

恩榮官張廷端墓表

嗟吾廷端汝何為遽止於斯耶千里故山來視其子子

秩垂滿將膺超擢汝何為而不待耶遺素殘墨流落人間至寶橫棄畧不自惜睹物思人將使吾何時而忘邪蓋廷端精於墨竹名著當時評者以為夏太常後一人而已仲子任南京禮部鑄印局副使自吳中迎至京南京公卿縉紳求其寫竹者輒交於門廷端性豪放酒酣興發輒肆揮灑凡卷軸及屏障間皆其筆也見者驚訝如在林澳予與廷端交最久情最洽以久別復會尋盟叙好意氣藹然乃出一長卷煩布湘川之景洲渚縈迴

萬竿林立以為傳家珍玩然非一朝可成時造予部後
春亭中為之曰此地隔諠避俗可放筆也予時舉盃以
助其興不似平時豪飲竊窺其容已有病態矣竟不能
成卷而去去數日忽報廷端以不能加餐藥不奏功而
卒物在人亡此所以增吾之傷感也歟廷端穎敏閭與
卓犖不羈早失怙與兄廷言同鞠於舅氏鄒自牧延師
教之長自樹門戶奉孀母四十餘年嘗遊學邑庠期以
科第進不偶援例赴京入國學例止滯留京師國戚太

傅會昌侯孫公昆季好賢禮士乃延於家塾誨其羣子弟相處凡二十年廷端言論侃侃多所規益侯昆季甚加禮待為買屋居之成化初又為乞恩授冠帶榮之其契愛如此晚思故鄉翩然來歸日以詩酒與鄉人娛樂甲午冬來金陵若學士錢公太常少卿李公劉公祭酒王公皆故人也相與延欸為懽論文賦詩以暢叙雅懷殆無虛日蕭然與世事若不相涉也識者高之其所著在京則有玉河稿肯堂稿在鄉則有歲春園稿江南釣

磯稿藏于家卒于成化乙未八月一日享年六十有二
生於永樂甲午閏九月二十日廷端常熟人諱緒廷端
其字也以字行初號夢椿太師楊文貞公諸公皆有詩
文嘉其孝別號肯堂曾祖樂常祖億之考以大號友竹
妣鄒氏配楊氏有賢行生三子四女子曰憲娶程氏曰
懲即局使娶吳氏卒曰心習舉子業娶顧氏女之壻曰
鄧雷舉人王銳鄒鶴王堂孫男四循環健登孫女四其
一擇配安州楊太守子恩餘在室懲扶柩歸卜某月日

葬海虞積善鄉郁澤里祖塋以予其父執也自為狀衰
經蹣門請言以表于墓嗚呼有志之士孰不欲以所長
成名於世然無所取重而託後無聞者多若吾廷端雖
斂其才而不獲少試然以墨君精妙見重於世後有睹
其奇蹟皆從而仰慕之此其名又安得而泯沒之哉使
廷端獲用於世則其成名於後未必有過於是也嗚呼
廷端其亦足矣吾故投泪而表于其墓使世之仰慕之
者併以得其為人云

墓碣銘

義官梅軒華公墓碣銘

景泰五年東南大侵餓莩盈路朝廷詔發倉廩以濟有
不足則勸助於民錫山梅軒華公首輸穀千斛於官得
賜冠帶階九品之榮退檢租簿凡累年逋負者以萬斛
計曰民饑如此何忍責償一筆盡勾不復索復貸佃粟
千餘石不取其息鄉人感戴皆舉首加額曰願公福壽
自是梅軒高義之名振遠邇成化二年十一月八日公

年八十以壽終諸子卜以五年正月某日葬於某山之
原欲樹碣墓上為不朽圖乃介予同年友王公敏行具
書幣賫鄉儒鄧倫氏所述行實來乞文刻諸石孔子曰
君子喻於義嗚呼公所謂好義之君子歟是以表其行
以聞於世按公諱佐字全亮姓華氏別號梅軒生而魁
岸凝重不好弄年雖幼如老成人從學於鄉先生余子
溫性資穎異先生偉其不凡比長即幹父蠡父喜曰吾
有託矣悉委以家事休閒自適公遂偕二弟全悅全紹

日課童僕服田力穡以殖業家日起乃一新其居凡奉
祀養親延賓教子之所皆位置堅樸為久遠計人艷其
能遭母喪哀毀骨立人稱其孝延明師於塾以教子姪
暇則與談理道資其麗澤宗姻間待之恩禮兼盡不致
失驩賢聲日著邑長吏舉督區賦仁恕公平大家牛車
小家擔負爭先樂輸公充其儲而民德其惠時巡撫工
部侍郎周公既知公端介命為總收深加禮待好施予
嘗建石梁五甃通衢數千尺以便行旅所費不訾感外

祖德則構亭立碑表其墓念大母及母二族無後則建祠奉其祀皆盛德事也於家事綜理尤密律身嚴謹外內斬然整齊有氣節一毫不挫於人人有過輒面折不貸鄉人有訟率走白於公聽其一言而解其為人信服如此晚年以後事為意一日語弟姪曰合族同居固為美事異日恐不能保吾見他子弟因貲致訟者多矣孰若及吾生前為汝處析不亦可乎皆謝不敢乃取田廬帑藏奴婢均析之付家事諸子優游燕居與知己觴詠

為樂朔望則焚香誦佛書而已一日得疾諸子以醫藥
進卻之曰吾年至此已矣何藥為汝等但能謹身飭行
不墜家業死無憾遂卒公系出宋戴公子考父食采於
華因氏焉春秋時華督其裔也南齊有孝子寶家錫山
十八世至榮仕宋徙汴又三世至原泉隨宋南渡復歸
錫居梅李鄉隆亭里又七世至璟宋德清茶園正搃領
則公之高祖也奕世衣冠為邑望族曾祖燧祖得昌又
徙興道蠶塘里父脩文有隱操母陳氏配鄧氏子三人

芝蘭數女一適顧雍孫七人威立本節朴質敏女六人
曾孫二人銘曰

胄啓於宋公族之宗逮齊孝子始居錫峯後徙不常復
歸於錫代多聞人衣冠烏奕噫惟梅軒偉乎其容慷慨
好義古人之風折券捐貲惠周於衆邃古孰儔南陽樊
重散給昆弟均一不偏邀則誰匹茂陵文淵家事勅斷
質成感悅河內向平太原王烈東漢高士今復見之章
服有曜稱德惟宜大耄令終自天錫類身去名存聞于

世世

京庠生默菴陳克遜墓碣銘

克遜諱讓姓陳氏默菴其號也其上世為雲間人洪武間徙闕石曾祖子真始移家來居金陵今為上元人祖

思聰父廷輝皆不仕克遜自幼好問學聰悟不凡比長入京庠為增廣生進德脩業勤厲不懈試優等補廩膳生以家去學遠夜宿學舍兀兀焚膏讀書殆忘寢食工文辭說理精確同舍生以為不能及累以尚書舉於鄉

輒不中人為之咎主司克遜則安於義命未嘗少挫其志也性孝友朔望必歸省侍母有疾刲股愈之父母相繼卒居喪哀毀幾滅性遇忌日及正旦冬至輒茹葷躬詣墓所祭奠事其兄某敬愛兼至拊兄子祥如己出為人端謹和厚交朋友有義氣重然諾取與不苟介然以節操自持隆於事師不以家儉而廢其禮提學憲臣以古之為教先德行後文藝命教官舉諸生中有德行者以示勸教官首疏克遜孝友之實舉憲臣甚優禮之

由是克遜之名益重於縉紳間矣克遜不為崖絕之行
遇人無賢愚皆溫顏以待人樂觀之執經從游者甚衆
相與剖析疑義教之作文曾無厭倦恒哀親不逮養冀
取科第沾一命得國家褒贈之寵以為親榮今秋舉又
不中鬱鬱不得志因致疾卒於學舍可哀也夫卒時神
思不亂區處後事甚悉成化辛卯十一月九日也春秋
三十有八生宣德甲寅四月十九日配南氏有賢行自
克遜病每夜稽顙北辰求以身代又割股為糜以進卒

不効嗚呼士負學術之美志行之高者宜得貴顯壽考
理必然也今克遜不幸不獲一遇以究厥施而中年夭
折又無一息以繼世果天道之無知耶抑天之未定也
耶然孟子以令聞廣譽為良貴韓子以生而不淑為非
壽死而不朽為非夭由是言之克遜為貴而壽矣克遜
之卒也聞者皆痛惜之其友陳士行為經紀其喪與其
兄擇是月十六日葬之神策門外石砢山祖塋復伐石
樹墓上欲予為銘以彰其聞於後世予素重克遜既哀

其賢而不幸且慰其心於溟漠也畀以是銘銘曰

孰俾其業之豐而身之窮孰俾其德之隆而厄之逢志
不一通竟賫以終視天曹曹莫知彼穹嘅顏殤與跖壽
蓋今古之攸同援筆灑淚抒九原之幽憤來萬里之悲
風

墓誌銘

故新建榮僖侯夫人趙氏墓誌銘

天生瑰奇之才建非常之業蓋必有賢婉相成於內焉

若新建榮僖侯夫人趙氏是已夫人世家河間交河性
恭順有識量父某母王氏嘗奇之曰是息必貴非凡子
耦年十七同邑李公士中聞其賢聘為子婦遂以歸玉
玉即榮僖也侯幼從戍營州左護衛在具慶下夫人執
婦道事舅姑盡孝敬洪武己卯文廟靖難兵抵太寧侯
即歸順隨駕南征夫人與別曰丈夫乘時奮庸當以身
徇國毋畏危自幸而懷內顧也侯是其言遇戰疾力故
積有勛績以底平定遂由總旗四轉至指揮同知夫人

在戎戍艱苦備嘗處之晏如也宣德己酉侯又以功四
轉至伯爵膺誥命階勲奉天翊衛宣力武臣特進榮祿
大夫柱國食祿八百石追贈三代夫人獲再封焉時家
既貴顯夫人克謹禮法閨門雍肅每訓子孫必先以起
家辛勤之道下逮媵妾有螽斯之美均視嫡庶合鴈鳩
之德至疏戚長幼處之罔不順適正統辛酉侯先下世
至是而夫人亦卒矣實丁卯五月二十三日春秋七十
有五子男七長曰英襲任府軍前衛指揮使次源早卒

次海次賢次良亦卒次春次奉女四府軍前衛百戶范
達其長壻也餘未行孫男七竒端佐倫儔仁使孫女五
曾孫男二瑾璿曾孫女二以是年某月某日祔于榮僖
之墓而英持其僚友都指揮僉事掌府軍前衛事李聰
所為狀來請銘嗚呼志不以窮阨而動行不以亨豫而
渝卒相君子就大勲享厚祿作則垂裕其賢可書以銘
曷辭銘曰

號虎之雄克奏膚公孰翼成之由賢在中享有茆土龍

章錫封貴富壽考德福並隆安仁之原是為幽宮體魄
永託流慶無窮

勅封孺人亡妻姚氏墓誌銘

嗚呼此為吾妻姚氏孺人之墓孺人諱守真以景泰庚
午閏正月初五日歿于南京年僅三十有二距所生為
永樂己亥四月二十九日歿後兩月予自朝鮮還朝始
聞其訃乃為位而哭祭之以文曰昔我聞爾出自名家
故講姻好我取進士赴京請命南還與爾結姻爾叔父

用歸于我同舟北上寓居官舍過來蓋十年矣爾父早
喪爾母來視母子歡聚于此亦已九年我仕朝著爾贊
家政勤苦卓立甘守淡泊與我志同和厚於親戚惠睦
於鄰里衆口一辭皆稱曰賢生子女六人乳養保抱艱
辛萬端然有決旬而卒彌月而卒不及晷而卒虛勞愛
育痛切于心今存者男得倪岳女得淑靜而已爾於前
年產後天癸不至詢諸名醫僉云有兒食乳者不為疾
去歲春初忽感熱嗽累治數醫綿延弗瘥秋來國家多

事人心惶惑誠恐爾生驚憂病益增劇故急遽之間遣
爾與爾母還家料理想爾喜見親屬病必可痊我徐圖
便差來視不意奉使東行比還即得凶問聞之頓足捶
胸傷痛無極況聖恩錫我勅命爾封孺人三月八日拜
受天寵正宜永享光榮何為不待而逝命之涼薄一至
此耶夫生必有死此固常理然不及下壽而青年夭折
永違偕老之願此所以為可深痛也豈心思抑鬱之難
療耶抑療治之不及耶抑大數一定而不可逃耶言與

泪俱不勝哽咽奠此一觴聊伸我心嗚呼哀哉祭訖翌
日上疏乞省祭詔許之撤位而歸爰卜是年十二月二
十日舉柩祔葬江寧縣新亭鄉祖塋之次燎黃以告孺
人有德容性聰敏通書史大意克謹婦道父諱友直其
先杭人也移家京師占籍上元博雅好古為時聞人母
王氏貞靜慈淑孺人之賢母氏之教也叔父曰友聞兄
曰愷弟曰恒曰悅恒為應天府學生銘曰

孰畀之淑也噫曷奪之速也噫從爾姑於茲麓也噫尚

歆承命服也噫彼蒼者天茫不可告也噫

明故奉訓大夫戶部員外郎王公墓誌銘

戶部員外郎王公年五十忽感奇疾奏乞養病于家詔
許其歸歸家檢方服藥優游十有一年而卒時景泰癸
酉十二月七日也春秋六十距所生為洪武甲戌正月
二日公諱鎬字子京生而豐秀動止異常童長老咸器
之被選入州學授博士經學大進甫弱冠以禮經中永
樂甲午京闈鄉試上春官屢辭乙榜弗就入國學卒業

業益成宣德己酉拜戶部主事居官廉慎勤職業性凝
重不妄言笑處事精密更不敢為姦用是利澤下流人
沐其惠秩滿書最朝廷錫勅褒之封贈父母妻室大司
徒雅重公奏遷補員外郎缺聲績兼茂物議以為得人
正統丙辰聞父喪歸躬負土成墳手植松柏哀號柴毀
人不能堪有芝生墓側鄉黨謂公孝感所致欲賦詩頌
公公曰草木何知力謝絕之服除仍舊資司徒方倚重
公竟以疾去公家法嚴肅以力本務學訓厲子姓晝耕

夜讀日有程課故壘以明經登進士拜戶部主事公之
教也嗚呼若公之材使不困於疾克盡展焉則利澤所
及益廣祿位所進益崇矣而遽止於斯不亦可慨也夫
然慶鍾後人足紹前列抑亦可無遺憾矣公先世汴人
隨宋南渡自高祖允恭而上皆居建康譜逸世系無考
至曾祖永福始遷和州故今為和州人父仲文樂善好
施以公貴封戶部主事母湯氏封安人配陶氏有淑德
亦封如母子男三長即壘次璟瑜女二適陸顯宋俊孫

男六世榮世昌世美世俊世傑世顯孫女四公之卒壘
解官歸將以年月日葬公郡西歷陽鄉祖塋乃奉吏部
考功郎中陳君亶所述事狀來請銘為之銘曰

學邃而端行方以完治世之賢中道邁瘠弗究所存竟
止莫前奕世濟美允蹈遺軌簪笏有傳茲藏體魄我揭
其德永固萬年

卧雲處士居公墓誌銘

卧雲處士者句容之耆彥也正統庚申秋予省侍南歸

嘗游其邑過處士見其子邑庠生輔侍側循循執禮聞
庭肅如知其德之刑于家也退遇邑人事有未白多就
處士求直無不悅服又知其德之信於鄉也心竊重之
歲丁卯秋輔以明經中鄉試歸處士已得疾逾月竟不
起矣惜哉實是年十月一日也春秋六十輔以明年正
月十日葬處士移風鄉小干村原尚未刻石誌墓景泰
甲戌輔會試春官大懼潛德弗彰爰奉監察御史張君
紳所為狀徵予銘歸納諸壙予素重處士者銘奚辭按

處士諱安字處謚性閒曠遠聲利偃息一室霏簷汎榻
皆無心物也因號卧雲祖仁父廣咸讀書有行義母李
氏處士幼有鉅志嗜問學樂與儒者游所交皆天下知
名士或勸之仕曰以漆雕子若從游聖門尚未能信於
斯吾何敢矧羣賢滿朝吾得沾沐德化耕鑿食力以盡
吾齒為太平逸民不亦可乎君子知其志之高尚矣平
居言笑不苟持身甚嚴闢家塾以教子弟小有過輒加
誚責以故皆馴謹無外驚嘗謂弟莊曰父母生吾兄弟

三人長兄敬早世惟吾與汝在恒恠世人閭牆生忿良
由為異姓所惑也尚戒於斯又諭諸子曰吾與汝叔生
既同胞死當同穴宜表曰難兄難弟之墓此吾志也汝
曹識之故邑之名有家法者必曰北郭居氏處士宅心
仁厚拯人饑寒卹人患難惟恐不及前後賴其舉喪婚
嫁者甚衆嗚呼易有之曰不事王侯高尚其事又曰履
道坦坦幽人貞吉書稱惟孝友于兄弟施于有政今觀
處士被褐懷玉不求聞達而慕仁好義率其素履篤乎

孝弟於易書所云蓋無媿矣雖抱道不試種而未獲然
教子登科將躋顯榮食其報者不在茲乎處士配陳氏
有淑德子三人長曰範次即輔次曰麟女一徐禧其壻
也銘曰

與雲為徒樂山澤抗志不降德茂積身雖云晦譽籍籍
惠愛在人永無斁甲子一終反窀穸慶垂厥嗣光烏奕
欲知幽潛視此石

明故贈刑部主事劉公墓誌銘

מחנה אהל מועד

歸燎黃追而納諸壙予不獲辭按公諱浩字孟然世家
永平灤州之七里河其先有諱君榮者仕元金牌萬戶
君榮生天麟襲父爵守大興州天麟生彥和值元季兵
擾失其官偕母避亂真定之井陘彥和生通甫通甫有
五子曰士中士舉士員士興其季即公也遷居滄州故
今為滄州人公生有美質慎舉止寡言笑自幼即知嚮
學通甫常拊之曰吾家世為武臣至我父子中經亂離
隳厥遺勲今遭際聖朝偃武脩文四方底定汝尚以文

進用毋墜先業乃遣入鄉校讀書洪武丙子偕鄉先生
孟鐸赴京講讀御製大誥受楮幣之賜回家益力於學
入州庠從學正宋經授尚書晨窓夕檠志不少懈逾年
經愛其篤學補廩膳生兩赴秋闈鄉試不偶修德講學
持操愈厲平生不解飲酒不近博戲專力儒業於秤斗
較錙銖市利俱所不識因積學過勤得疾經歲不起竟
卒年方三十有二通甫葬之龍堤北三嶺原每閱公所
業輒仰天大慟曰天乎何奪我愛子之速耶我何以生

為親隣聞之莫不灑泣通甫拊教二孫遣讓入州庠紹公志語人曰吾行不媿天既折吾子此孫必將顯吾宗也恨吾老不及見之今讓登進士第拜秋官擢叅政其言有徵云嗚呼公舊為簪纓家功德及人者久遭世多故門祚中衰公積學種德將起而振之亦其時也而青年夭折此天之莫可致詰者使世為善者觀之不幾於急乎然慶鍾於子致位顯融公雖則不獲祿位於生前而榮享褒卹於身後為善之報信不爽矣是宜系之以

銘銘曰

命雖天名則壽骨已化德不朽約於身豐迺後龍堤我
我土深厚茲焉是藏啓厥佑我銘明之永垂久

陸母王氏墓誌銘

太學生陸通孝于父母得請寧親於家時率其婦若子
列拜稱壽承顏養志恪脩子職親心甚樂也逾三年通
治任北還太學辭親以行而母疾遽作即解任召醫躬
侍湯藥疾日轉劇臨終謂通曰吾為婦弗逮事舅姑力


勤儉以相汝父克有今日及午刻吾逝矣滿眼惟汝一
子所望出為時用宜砥厲名節毋貽祖宗羞庶足光門
祚也汝其慎哉言訖氣息奄奄而卒蓋景泰乙亥九月
十九日也春秋六十有八洪武庚午十一月十一其生
之日通哀毀持喪將以明年三月十六日葬于城南牛
首山文殊嶺祖塋之次乃緘翰林編脩戚君瀾所述事
狀走書數千里來謁銘予與通為同庠友又同里閭素
知其孝又知母賢銘奚辭按母姓王氏諱激字本清舊

為姑蘇著族洪武中家以間右徵遂移實京師為上元人曾祖諱德仕為安仁尉祖諱興二父諱文貴母吳氏文貴無子惟弟一子少鍾愛母甚及笄為擇嘉壻得同里陸友誠曰王陸載郡乘族相埒遂納諸甥館友誠善治生母助理于內產業益豐裕日致滫瀡滑甘以養父母皆手自烹飪不以假婢使後文貴卒母謂其夫曰妾父承宗系之重不絕如綫幸從弟已長欲俾自立以紹王氏宗祧可乎友誠賢其言盡推所有與之惟取荒顛

朽敗者自給久之業復起雖家無贏貲而吉凶賓祭之需未嘗告乏由母之能節縮也平居寡言笑御下寬肅有矜卹心嘗有賈媪寘貨物于母去而暴卒物主索之急媪子莫知所寘不能償母召而歸之媪子德之為稱頌于人人用是里鄙皆知其賢云子男一即通博學多材以庠生升太學躋顯融有日矣孫男二曰貞曰崧貞早卒孫女四銘曰

子也克孝婦也盡道母也知教德也允蹈前培後紹爰

食其報勒銘玄兆百世有曜



倪文僖集卷二十七

欽定四庫全書

集部
倪文僖集卷二十八

詳校官庶吉士_臣陳若霖

總校官檢討_臣何思鈞

校對官中書_臣汪學金

膳錄監生_臣費元震

欽定四庫全書

倪文僖集卷二十八

明 倪謙 撰

墓誌銘

大明故平羌將軍甘肅總兵官西寧侯宋公墓誌

銘

國家以神武戡定區夏允賴罷虎之士佐成鴻業於是
錫爵酬勲俾傳罔極然出自閭閻者恃崇高而昧學識

備員尸祿者為多求其席父祖遺勲荷國家重寄輒能
懋騰聲績者予於西寧侯宋公蓋僅見也公諱誠世家
鳳陽之定遠曾祖諱晟膂力有威重當我太祖高皇帝
龍興初隨父兄來歸從下江南定中原東征西伐勲名
日盛拜僉右軍都督府事出鎮甘肅太宗文皇帝臨御
陞後軍都督府左都督尋授平羌將軍充總兵官遣廷
臣即軍中進封西寧侯世父諱琥駙馬都尉尚安成公
主襲侯爵仍授平羌將軍總兵甘肅祖諱瑛駙馬都尉

尚咸寧公主亦襲侯爵北兵擾邊扈駕將兵往平之沒
於戰陣追封鄆國公謚忠順父諱傑襲侯爵典宿衛禁
兵克篤勤慎母蕭氏中都留守蕭某女貞靜有淑德公
幼聰悟好讀書性孝友軀幹魁頎雋爽及冠美鬚髯善
騎射有勇畧景泰初侍父居京師壬申往視別墅於涼
州寇入境掠牛馬長驅而北者公時率家僮出獵遇之
連發三矢殪三人敵駭散驅其所掠而還邊人驚歎曰
真將種也甲戌還京痛祖死節承父命還南京祖塋具

衣冠以葬乙亥春侯疾作馳書召公夏五月公兼程至
京泣拜侯床下侯曰吾忍死待汝今及見吾目瞑矣越
七日而卒公哭踊幾絕殯殮如儀上遣賜祭營葬公扶
柩歸葬祖塋罔不周慎秋九月襄事詣闕謝恩詔令嗣
爵每侍朝上顧其狀貌甚奇之謂可屬大事不數月命
署右軍都督府事政如素習尋賜璽書命出鎮甘肅授
平羌將軍印充總兵官公至鎮夙夜惴惴圖紹先烈訓
戎兵拊士卒謹邊防明斥堠革姦弊公賞罰秩然武備

修飭封疆完實一日閱武教場忽中風疾亟昇歸而氣已絕矣時天順丁丑十月二十一日也享年三十有一訃聞上悼惜為之輟朝配田氏旗手衛指揮田忠女克營公喪戊寅扶柩至京擇地都城北某庄之原以葬請命於朝上遣有司諭祭營冢壙卜以今年某月某日葬焉嗚呼公本貂圭世胄宜為驕侈所溺乃能折節務學養成其材是以甫嗣侯封遽登樞府總戎西陲月未一朞即收安輯之效使天假以年則外服羌敵內固邊境

屹然為國保障當與古名將埒矣大厦方建梁木中摧
不亦可慨歎也夫公無子以弟讓嗣封讓乃具事狀請
予銘其墓予與公有過從之雅其塾師錢司訓景和予
故契也素聞談公家世行已為詳忍無言乎遂為之次
第而系之以銘銘曰

神龍飛天雲駿奔闔闢再造乾與坤桓桓虎臣識所尊
慷慨仗策歸轅門揮戈崩角孰敢捫率師奮伐車噶噶
秦隴底定戎旅屯甘肅出鎮作屏藩分茆錫爵功首論

食邑西土傳後昆雙麟並出玉潤溫嗣侯尚主通天閣
繼世守邊臨浩疊振揚丕烈光炳輝廼父禁兵司虎賁
鑾輿扈從陪金根惟公挺生志高騫長身玉立虬髯掀
鬚蟠豪氣雲夢吞好文能武勇畧存國家倚任錫寵恩督兵
樞府肅不喧眷顧西陲古煌燉往佩將印平羌渾威行
徼外控諸蕃奕業濟美古莫倫邊塵不驚靖塞垣武備
甫飭嗟沉淪聖皇悼惜卹典惇命雖夭折名節完靈輜
歸來萬里羗白壁下瘞城北原我銘揭休刻璵璠令德

億載永弗諼

故錦衣衛指揮使徐公墓誌銘

天順改元之春皇上自南宮復升宸極維時錦衣衛千
戶徐公暘從總戎中貴衷甲挺刃以防不虞事定以功
陞指揮同知賜白金文綺越三日召暘至武英殿勞之
有曰朕在南宮卿每仍共事達忠款不避艱危朕念不
忘其陞暘為指揮使子孫世官倍賜白金文綺俾御用
監寫經日給大官酒饌越明年夏病暑六日卒于澄清

坊甲第實戊寅六月十三日也享年五十有二訃聞上
深悼惜之公字孟暘姓徐氏暘其諱也浙之鄞人其先
世家於杭十世祖某宋承事郎某生諤舉進士尚書省
幹官諤生天佐臨安府監稅天佐生天民國史實錄院
校勘官丞相江萬里表知安吉州辭不受歸以琴自樂
琴得東嘉郭楚望天台劉志方之傳與守齋楊少師三
衢毛敏仲製紫霞洞譜傳世徐氏琴自天民始天民生
企宋承節郎元世祖既平宋遣使召天民時已卒促企

入覲世祖聞琴歎曰騰格哩浩爾齊華言天下樂師也
俾授完顏壽曲為製完顏譜命官不受歸隱檇李南陽
村企生德符舉茂才兩浙鹺司大嵩場管勾製琴史雜
言曲調卒於鄞縣大白里因占籍焉曾祖和仲通春秋
編宋史要言鄞學訓導文廟潛藩時以琴召見受重賚
及即位和仲已卒召其子惟謙及孫守真俱至南京克
傳家學賜第北安門外扈從來京仁廟嗣統拜惟謙右
順門待詔未幾惟謙守真相繼卒公之祖父父也宣廟

知公世琴命隸錦衣共事御用監正統九年皇上選公
寫經賜楮幣以琴直南薰殿景泰初以年勞拜府軍衛
鎮撫轉錦衣尋調留守壬申鼓琴稱旨復轉錦衣甲戌
陞副千戶兩轉至今職簡在上心眷注方殷孰意其遽
止於斯也耶哀哉公居家孝友樂善好義質直無隱伏
與人交全終始性穎敏軒豁博涉羣書工律詩書法尤
精不嗜酒退直偃息一軒左圖右史幽清絕俗客至焚
香瀹茗談古今理亂論人品得失疊疊不倦或乘興取

琴鼓一再行襟度洒如予每造之塵慮未嘗不瀟然滌也公感上知遇一念忠愛貫乎金石雖風雨漂搖曾無少變其氣節不亦可尚也夫公妣呂氏生公及昭其衆弟曰琳璉玫瑤配田氏循婦則子二長甫東駕隨侍舍人次用皆能業琴與書以承公教女一武功左衛指揮男王宣其壻也甫用以故鄉遠不能歸乃擇地都城朝陽門外某村之原卜以卒之月二十六日葬焉乃奉刑部郎中錢博所述事狀請銘墓石予與公交久且厚為

知己而刑部之狀又可按不誣謹取其忠義之著世所
共知者銘之其辭曰人囿於氣數固有定修短與奪孰
云非命已乎孟暘侃侃忠敬憂國忘家罔知危阱卒翊
龍飛底于康靖皇曰賢臣功莫與並寵數方隆一僨不
競豈其定者有司其柄壽止於斯延後有慶勒銘堂封
百世可證

奉訓大夫鈞州知州項公墓誌銘

公諱巍字伯高姓項氏浙江金華人也世居溪下界通

濟橋曾祖某祖壽欽考文昌俱隱德弗輝妣李氏慈惠
淑柔文昌於洪武二十五年以貲殷富移實南京占籍
應天之上元居龍江復成橋樂施予多以棺槨助喪賙
卹貧困不望其報公天資淳厚器宇凝重自幼不好逐
里中羣兒戲舉止老成長幼咸異之嗜讀書不待督勸
而勤永樂間以民秀選入應天府學為弟子負習毛氏
詩學日有進弟曰富克幹蠱以治其家公養親有託克
畢志問學晝夜恒居郡齋率朔望休假乃一歸省為師

友者皆推重之挾所得屢遊場屋不偶不以病有司務學益力宣力五年貢于春官升北京國學迎親就養十年秋丁母憂權厝都城之南服除詣銓曹正統四年奉命隨監察御史按巡廣東有能名六年使還釋褐直隸真定府通判在保定易州山厰督合郡官夫採運薪炭以供國用公廉勤端慎子惠下人待以誠信課工必均其力輸納必寬其期用是樂於趨事國用無虧人不告勞九年春丁父憂官民保留例不許扶柩并啓母櫬歸葬

金華婺女鄉馬海坂之原服闋工部尚書陳公恭總督
易州薪運具奏保公廉濟十一年冬乃轉山東青州府
判仍舊督運十四年移山廠於滿城事甫新創規畫得
宜景泰四年滿九載秩五年以最績陞河南鈞州知州
公宅心平易孳孳愛民民皆悅服每懷止足之戒天順
改元春有事來京陳辭請老遂獲休致之命聞者賢之
公體貌豐碩冬感寒嗽喘逆醫久莫療以明年月日卒
于京師春秋六十有五距所生為洪武某年月日室俞

氏同郡醫族女貞孝靜專克遵婦道子男二長曰銘先
公一年卒娶劉氏次曰鍾娶某氏女三皆未行嗚呼公
朴茂沉篤表裏如一待人溫然可親處事介然有守外
無鈎距內無畛域信乎君子人也謙自垂髫讀書社學
即被公所知時大理胡卿巡撫南畿興學廣士公言謙
於卿召為府學弟子貞遂遊公講下承其誨益則謙今
日得踐仕階者皆公之賜也安敢忘公大德乎鍾以遠
不能歸乃奉母命擇地城南東臯村之原卜以是年八

月日葬公來問銘於予謙傷公壽不附其德誠為可憾然其平生始終惟謙知之為詳也非謙銘之而致有遺德不亦尤可憾哉乃敢不媿蕪陋以謙所知次第書之俾銘刻石藏諸墓銘曰

德蘊厥躬若玉在璞才充於用若錄之削不殫民力趨者自樂循良宜弟恤乎民瘼辭榮引年制行之卓允矣君子不負所學存者實豐胡壽之約永藏斯丘土厚水渥斲石揚芳其辭也確百世垂休後者其作

明故大中大夫山東參政左公墓誌銘

公諱璚字世瑄姓左氏世為江右南城宦族以明經中
永樂甲午鄉試登戊戌進士第觀政都察院辛丑拜浙
江道監察御史壬寅丁父憂起復改湖廣道正統戊午
陞廣東左參議景泰辛未九載秩滿陞山東左參政癸
酉以目疾乞致仕天順戊寅得疾終于家實五月某日
也公少聰悟好學甫七歲補郡庠弟子負成童母嬰疾
貼危徒跣走禱于華蓋山比歿哀慟柴毀既冠從鄉先

生前御史聶宗尹受春秋經先生見其端厚頴敏曰此
吾鮑宣也以女妻之父嘗患背疽時年八十衆醫已莫
療公已出仕喪耦適以續姻還乃禱于天願以身代忽
遇遠醫至療之獲愈人以為孝感為御史時嘗奉命按
治陝西平反冤滯繩糾貪墨風采甚著代還受勅命進
階文林郎封贈父母及室時都御史顧公佐總憲臺綱
振威望獨器待公凡疑獄難決者必以屬之尋督處州
銀冶趨利者衆恒弄兵爭攷公痛繩以法莫敢犯嘗有

虎為民害公捕絕之復奉勅考察浙江官吏激濁揚清
旌良斥暴輿論允愜其在廣東時清理軍政姦偽莫售
嘗往瓊崖招諭黎猺悉聽約束漳潮寇發公以兵擒首
亂者罪之餘皆釋去廣寇黃蕭養勢日猖獗公即率兵
還討又往廣西徵兵造船以禦之寇平與有功績滿復
受誥命進階大中大夫封贈如制其在山東時總督民
賦公徵輸有藝賦足而民悅甫二載謝事去其居鄉里
比歲薦饑公發粟以濟全活者甚衆鄉人德之公寬裕

仁讓和易可親以清約自持不為斬絕之行歷官中外
幾四十稔所至興利除害惠澤在人每思世人飾誇辭
而寡實行因號訥菴以自厲所著有訥菴稿辭旨溫醇
務於析理又嘗編次晦菴刪定古文孝經及春秋要旨藏
於家春秋七十曾祖諱明叔元三公府從事祖諱彬卿
平樂州學正父諱彥彰贈監察御史廣東參議母周氏
累贈恭人室聶氏早卒繼白氏贈封皆恭人子一人曰
贊登進士任吏部稽勲主事白出也孫男一人孫女三人贊

將歸卜以某年某月某日葬公城北黃湖山之陽奉其
同邑國子博士房令所述事狀來請銘嗚呼若公文章
政事表表著聞而功名始終克全晚節其德若斯銘何
媿乎銘曰

干霄之木節勁匪曲棟此厦屋也大鈞之杙八音禪續
厥聲穆穆也繅藉之玉瑩無類蓄終迓初匱也老成範
俗胡然不祿景仰賢躅也黃湖山麓玄兆所卜銘用振
其馥也

明故奉天翊衛宣力武臣特進榮祿大夫柱國武強伯楊公墓誌銘

天順庚辰閏十一月朔鎮朔將軍總兵官武強伯楊公以疾卒于位傾城駭痛市為之罷遠近無間老稚婦女皆哀慕如失父母訃聞上震悼惜之為輟視朝一日遣官諭祭命有司營葬事賻卹其家公無嗣其弟倫自京師來奔喪扶柩還京卜以是年十二月某日葬阜成門外釣魚臺原從母兆也乃欲為兄不朽之圖丐謙銘其

墓石謙辱公愛厚義弗容讓謹稽其世系勛伐德善之
跡為序而銘之公諱能字文敬系出太原霍山王宋有
諱輒者官揚之六合子孫因家焉高祖順不仕曾祖政
漢中衛百戶祖璟嗣政璟皆贈柱國昌平侯父琳封後
軍都督府都督同知妣陳氏贈夫人督府昆弟三人伯
洪昌平侯追封潁國武襄公季忠封後軍都督府都督
僉事督府其仲也洪武中潁國嗣百戶調官開平偕二
弟來宣府督府實生公於城南寓舍公端重和厚早知

嚮學習武事勇畧過人宣德中督府命公省先塋之在漢中者公獨走關西展奠盡禮挈族屬還聚宣城督府喜公之孝正統初穎國知公材器不凡俾客遊江淮吳淞以博見聞還留侍帳下甲子春從穎國戰伊克穆蘇生得戰士二十餘斬首倍是獲其畜衆什器拜開平衛所鎮撫初公有族弟智歷官開平衛指揮使歿子軍家奴嗣亦歿姪宗嗣幼疾穎國欲以公易之丁卯秋疏聞詔能嗣智職宗嗣能職戊辰冬穎國遣公出境詞敵遇

於灤河三岔口先登生得若干斬獲有加擢都指揮僉
事己巳秋從穎國哨大同遇敵聚落店追北至拷栳山
生得二人奪回被掠人畜什器尋從左參將都督朱公
哨懷安戰敵城東生得一人親械詣京有白金文綺之
賜冬勅召穎國還朝公從之賜以白金文綺時北騎入
寇勢猖獗甚即命公督兵征哨戰敵紫荊倒馬二關左
右臂中二矢生得若干斬首有加奪回被掠人畜甚衆
景泰初元春擢都指揮同知賜以白金文綺尋勅充遊

擊將軍提兵宣府巡邊賜盔甲弓矢佩刀銀盃文綺楮幣夏戰敵萬全右衛及西八里溝矢中左股生得一人斬首有加秋還朝擢都指揮使冬詔仍充遊擊將軍統神機京兵辛未春居母夫人喪奪哀擢後軍都督府都督僉事命充左叅將鎮守宣府賜以楮幣夏詔洪充宣府總兵官掛鎮朔大將軍印能進都督同知仍充左叅將信進都督僉事充右叅將信公從弟也一門三將同鎮邊陲時人榮之壬申冬命充左副總兵癸酉夏賜誥

封贈父母妻甲戌春勅召還朝總練神機京兵天順改
元春迎上復辟擢左都督賜白金二十五兩綵幣二表
裏尋奉制諭充總兵官掛印鎮宣府賜白金五十兩綵
幣四表裏夏大同有警詔公選精兵付裨將討之公願
親行賜勅獎厲命統前兵戰敵磨兒山及石灰站生得
六人斬首十五級及奪回被掠畜衆秋進爵武強伯食
祿一千石時敵饑敝公欲乘機出勦詔慮輕敵勉使持
重不果戊寅春錫以誥券加封奉天翊衛宣力武臣階

特進榮祿大夫勲柱國制詞有剛毅忠良能驅強寇之
褻秋諾延衛來報敵將入寇公欲以狄攻狄給礮火俾
夜斫其營果如公計破賊已卯夏敵近大同公引兵赴
之至皆驚遁庚辰春城順聖川工不閱月人無告勞秋
敵入洗馬林公追及於新河口生得一人尋獨石有警
公出兵勦之戰敵韭菜衝追北數百里至保昌州敵勢
迫皆棄輜重遁獲其畜衆什器師還俄大同警報即引
兵往敵已退公還兵保境敵聞公還復入公復馳往敵

又退乃耀兵塞上敵遁不敢復入逾月師還奏罷軍士
官馬徵償官仍為給補獲免者數千家仲冬廿六日公
自閱武回偶感寒疾醫誤以氣治病六日遽卒悲夫卒
之旦猶力疾籌邊務及是而逝無一語及家事公先往
大同時丙夜兵將發有星如孟墜城中光燭地有識為
公憂之至是卒驗云公英敏詳慎慷慨好義平居循循
然遇敵則勇氣自奮善用兵號令嚴明師行整肅有食
民一瓜者輒置於法與士卒同甘苦遇寒凍者則出私

帑市皮裘衣之病則給以肉糜遣醫療視死則棺殮祭之必歸其喪故人畏威懷德樂為效死止兵敬憚至以楊爺稱之雖古名將不是過也修築邊城斥堠得法敵不能犯擇地蒔蔬鬻供公費盡革科擾之弊築室數百區居河南戍兵樂得其所持身廉介深達下情有懇訟者灼見情偽咸服其明性至孝視膳問安不離親側未嘗輒入卧內惠睦宗姻嘗出貲嫁族之孤女不遺故舊交全終始下賢禮士人樂親之蓋春秋僅五十有二而

卒距生永樂己丑十一月十五日配張氏先公八年卒
藁葬宣城今遷柩合葬繼王氏女二長適宦族王英次
適龍門衛指揮使張祥銘曰

天佑國家篤生英賢降神鍾靈節彼燕然偉器雄姿視
前無古將畧世承允兼文武乘時奮庸懋建武功由裨
及專遂躡父蹤乃總元戎乃酬閔閔鐵券金貂虎符龍
節邊庭畏卻保我塞疆惟忠徇國罔敢或遑桓桓虎臣
為北藩屏威德昭宣永息邊警國有輔翼人有怙依而

不永年其誰不悲誰能不死貴遺休聲猗嗟武强芳流
汗青釣臺之原深閼玄宅揭德振華為刻此石

故驃騎將軍萬全都指揮使司都指揮使李公墓
誌銘

公諱顯字君謨姓李氏山東濟南泰安州人曾祖諱先
贈明威將軍蔚州衛指揮僉事曾祖妣陳贈恭人祖諱
旺前淮南樞密院副樞洪武初歸附從薛右丞常國公
徐丞相西平侯宋國公定遠侯穎國公等征伐四方靡

不克捷累官大同左護衛指揮僉事祖妣戴封恭人考
諱榮嗣前官改大同左衛妣張公自幼齡喪父優給以
祿永樂庚子嗣前官宣德庚戌從楊武侯城獨石赤城仍
從恭順侯出塞燎荒巡邊乙卯選領騎兵沿邊巡哨正
統丁巳從總兵官都督方政遊擊將軍楊洪巡哨徹爾
山斷頭山等處尋以刑部尚書魏原選統兵駐札沿邊
樺皮溝等處巡哨癸亥從左叅將石亨統騎兵出塞偕
弟茂茂子瑄遇敵金山戰勝有功甲子擢指揮同知賞

白金絹布茂瑄皆陞大同左衛千戶己巳用薦陞指揮使守備大同再陞署都指揮僉事尋加實授截殺敵兵斬獲有功景泰初元陞都指揮同知賞以銀布復遇敵兵戰勝有功辛未陞署都指揮使天順改元詔加實授尋奉勅充右叅將分守西路未幾調萬全都司掌印視事辛巳冬十月十三日以疾卒于位公性樂易和緩不立町畦凡事務從寬厚有長者風容貌不踰中人而沉毅有膽畧善用鐵義遇敵不懼所向必克識見超卓文

移山積剖決無滯發摘姦隱吏不敢欺勤於任事恒日
昃不暇食不告劬勩用是在官無逋責在下無稽怨臨
邊有中貴將臣臺憲公事之皆合其志寮屬雖多公處
之皆得其情治家雍睦交朋友克全信義御臧獲有恩
中懷坦然未嘗營利卒之日家無餘貲其賢可知矣公
疾革諭子英曰吾疾殆不起矣汝當祇承世緒宜以忠
君孝親為志善事季父友愛弟昆教子孫以詩書習武
事雄宦遠方吾不得見矣子在汝所其善拊之言訖厭

厭而絕享年五十有七距生永樂乙酉八月六日配張氏大同左衛千戶張忠女善助有淑行側配黃氏子女四人長即英大同左衛千戶次雄廣東潮州衛千戶女一嫁錦衣衛百戶朱遠俱張出次俊黃出孫男三人玓琦珅孫女六人俱幼英以今年某月某日奉柩歸葬大同白羊城西祖塋賁公事狀衰經躋門泣請為銘以誌諸墓謙被謫來邊荷公待以客禮矧目擊盛德於公也無能為役則銘公之墓尚奚庸辭銘曰

世澤之延有開必先源深長也轉坤旋乾大明麗天來
裸將也爰佐有虔摧攻無堅武惟揚也戎階屢遷奕葉
承傳功用償也嗣龍受旃簪紱蟬聯業彌光也噫公早
年日薄虞淵克自強也受命巡邊廼息烽烟兵威張也
名日以宣進握將權竭忠良也分閫萬全委任益專勤
靡遑也厚德宜綿壽阨不前咸盡傷也如彼力田穫在
後賢允繁昌也戕戕新阡揭芳有鐫永寧斯藏也

守備塔山指揮使李希仁墓誌銘

正統己巳冬余嘗奉詔往使朝鮮道經塔山時遼東新被寇鈔敵勢猖獗數入為患守備指揮同知李希仁率兵勦殺追北出境敵窮迫棄輜重遁去獲其人騎而還予目擊其事嘉其年壯志銳勇於敵愾為作逐北歌美之是後敵望風畏懾莫敢逼其境他方有警希仁輒提兵往援戰屢有功朝廷重之擢為指揮使天順六年以驍雄奉勅簡拔統兵禦敵希仁率精騎五百遇敵義州敵有衆三千希仁以為彼衆我寡非力戰不能破乃令士

卒下馬各執刀銃免胄親冒矢石步戰而前無不一當
百敵大潰斬其酋哈達巴圖等一十二人俘獻于朝上
錄其功方議褒擢而大用之而身不待矣可慨矣夫其
弟顯頊來京師奉事狀謁予泣拜以請曰先君之歿賴
先生嘗賜之銘予先兄辱先生愛厚不幸亦歿幸哀而
重賜之銘予顧希仁才畧膽氣表表出倫恒期其建功
立業為國保障必將銘鼎彝荷貂圭有不難致者孰意
其遽止於斯也尚忍銘其墓哉雖然知希仁者莫予若

銘奚可辭按狀希仁諱榮李其姓希仁其字也世為古邳人祖諱興洪武初從太祖皇帝削平僭叛以戰功歷陞應天衛指揮同知父諱昭幼嗣父職克自樹立志節英偉累從太宗皇帝北伐後備禦遼東有功嘗受內帑之賜宣德庚戌新設定遠選公董治衛政尋荊塔山復推公築守公規畫有方不逾年城郭完繕公廨府庫甲兵悉皆充備希仁嗣守斯土綽有父風遇戰身先士卒不避艱險慷慨臨敵勇氣百倍未嘗挫衄以故聲振邊

鄙凡論邊將之威武者必及於希仁也希仁性至孝父
卧疾半載晝夜侍湯藥衣不解帶比歿毀瘁成疾事母
夙興必先啓而後視事得佳味必奉母而後敢嘗與弟
顯友愛無間志忠篤昔駕在北庭每旦具衣冠登城伺
西北泣拜誓欲雪憤好問學樂施予公餘手不釋卷賙
人之乏拯人之貧喪賻以棺槨獨老贈以粟帛人德其
惠善拊士卒樂為効用凡有警各城皆清野入壁獨塔
山耕牧自如十數年敵絕窺覘境用寧謐希仁之功也

卒之日士卒哀悼如其父母北使過者亦皆拊膺大慟
設奠乃去其德義感人有可見矣希仁生洪熙乙巳五
月十三日卒天順癸未八月十日春秋三十又九娶白
氏金州指揮使白能女繼娶孫氏徐氏周氏子五人永
寧永宗永宣永宜徐出永安孫出女五人以卒之年九
月四日祔葬塔山城西祖塋銘曰

鷹揚鳳翽而孰畀其全兮山頽玉折而孰奪其年兮太
微卽將澹其餘星躔兮華表海鶴何時歸來乎故阡兮

子孫孫子尚彌永其傳兮

靜菴徐處士墓誌銘

徐處士昱字季東別號靜菴金陵之隱君子也其先為姑蘇茂族曾祖谷祥祖仁皆以德善著吳中父子宇先生洪武間以儒醫徵入太醫院始遷京師故今為金陵人先生碩德雅望為時所重與蔣恭靖公齊名其所交與皆名賢鉅夫處士夙承家教日侍燕談得於耳濡目染以故學邃行端動止不苟少欲博觀天下名勝吳越

閩海多所遊歷所至親賢取友其識益充遊力既倦乃
歸構一樓扁曰怡晚棲跡其中有終焉之志度列圖書
自聖經及諸史百氏靡不貯儲日事披索以自怡得異
書必手自抄訂嘗曰聖賢之道在是吾終日求之思以
體諸身也或勸之仕不應尤精於醫得家傳之秘治人
疾無弗愈者酬以直不受曰吾既不試此亦可以濟人
耳豈計利哉人德其惠爭為詩文以頌之士林諸賢聞
處士名多與內交蕭山魏冢宰公臨川王宗伯公雅重

處士聞其及門躡履迎之或造其廬講論彌日冢宰已
歸休年九十餘猶貽書不絕嗚呼處士抱道於已而無
求於世若此可謂隱君子非歟處士儀觀脩整性度矜
嚴與人不妄接待人必以誠居家孝友奉父母得其懽
心事諸母伯兄敬愛老而彌篤家饒於貲樂周人之急
生二子曰垕曰圭皆有樹立方將以家事付之不幸相
繼夭喪垕遺子鎮處士拊愛甚至歎曰吾行不媿天遽
奪吾二子何也抑昌吾家者在此孫乎乃闢西塾延師

教之鎮亦英畯好學駸駸有成配余氏早卒終身不再
娶垕娶劉氏卒繼魯氏主娶顧氏皆以貞節自守女三
人某某其婿也孫女二人俱幼養子育之以恩不異已
出處士恬靜寡欲人期其必登上壽然春秋僅七十有
五而卒以故咸悼惜之處士生於洪武辛未八月初五
日卒於成化乙酉八月十一日鎮將奉柩以是年九月
某日於江寧縣萬善鄉燕湖村之原啓俞氏窆合葬乃
奉其師鄉進士陶古淵所為狀來乞銘嗟夫古有特立

獨行之士不用於世則不能自見於天下匪得史氏表
著之惡能以傳於後哉然則今之特立獨行非處士其
人乎顧予雖不足以表著之或賴是可以傳於後此所
以不可以無銘也予何辭銘曰

噫嘻處士敦古學也全醇保和還太樸也銷聲闕彩蹈
遐邈也玄酒在卣玉不琢也雖約爾躬澤流渥也委順
歸寧其藏確也我銘無媿辭庶用昭其卓也

故靖菴處士李公墓誌銘

金陵有清修廉靜處士曰李靖菴者年六十有七以成
化三年五月九日卒于正寢其季子觀予門壻也奉僉
憲王公所狀事行及其姪孫應天府學生寬續述來請
銘按處士諱詠字太素姓李氏靖菴其號也先世姑蘇
吳縣人高祖道復元世祖朝為平章政事翰林學士承
旨曾祖春山明宗朝為監察御史祖成之父文正入國
朝俱不仕洪武中以貴富徙實京師占籍應天上元處
士生而端慎詳雅有志於學祖父暨兄時芳皆擅鑒別

攻琢寶玉異能入事尚方永樂宣德間累蒙聖恩優復
其家家日饒裕處士用是得休閒自適從謝儒士孔昭
遊博涉文史兼得其畫趣聞冬官華主事某講易有得
由是潛心於易手不釋卷與劉中書某論書法遂善書
志尚恬退不慕榮進於世味紛華勢利之習畧不掛懷
抱謙巽自守與物無競惟日以圖史資檢閱得昔人詩
文未刊者必手自抄訂好蓄古彝器物恒置座右以供
玩喜吟詠趣有所得多於詩發之所著有醉吟稿少遇

方士陸致中口授鉛汞龍虎丹訣每欲脫屣塵凡棲跡太華山以太華有太虛臺因號太虛散人作太虛散人傳及古朗月歌招隱辭以見志構一樓以居扁曰此樂凡佳客過從必開樽談笑豁舒情興為文記之暇則或策蹇或肩輿登山臨水以遨以遊竟日忘返事親盡敬養預買地為壽藏人稱其孝嗚呼若處士者雖居市廛之中然安分樂天無求於世其特立獨行夙與流俗自異故其生也為無忝其歿也為無媿蓋有隱遁不汙之

節馬可嘉也已處士生於洪武辛巳九月十三日配臧氏子四晉娶徐氏益娶周氏節娶尹氏觀娶倪氏女二適潘衢石城尹羅瑄孫男四瓊璨玘孺祔葬鳳西鄉先塋其葬之日則卒之月十九日也銘曰

所樂者道而不逐物遷所甘者澹而不嗜物妍所牧者卑而不為物先嗚呼茲非尊尚之賢委順天年是曰歸全焯德有鐫永安斯阡

故父菴陳先生墓誌銘

金陵有儒醫曰艾菴先生天性淳厚居家孝友讀書寒暑不輟世業醫克究家學父菊隱翁為太醫院士永樂中車駕北巡仁廟監國翁當扈從先生請於仁廟乞代行不許因留侍左右日見親寵多所嘉賚好種蒲養以盆池奇石供清玩一日梅雨中置蒲軒外忽一叟冒雨至揖曰聞子幽清來共賞之乃延入座話若脫畧世故者久之辭去竟不通姓名先生異之他日雨叟復至先生待愈恭叟曰醫貴有恒於子見之五月一日宜候我

虎踞山吾有以教子至日疾不果往越三日去則叟莫
知所適矣惟於寓所得書一函歸啓視之皆方書秘訣
也由是洞明要旨藥人疾一七輒愈人皆以其遇異人
故京師有一貼之稱且心存濟利未嘗責報大司馬靖
遠伯王公少宗伯羊城陳公吳郡金公皆有贈言推重
好古今法書名畫嘗捐金購之景泰中居燬於火先生
惟抱歷世遺像自烈焰中奔出他一無所恤喜賓客座
席常滿談笑生風嘗以出自相門世胄扁其堂曰培德

以自警曾學士鶴齡為之記宣德辛亥喪母哀毀還葬
四明蔬食者三載菊隱歸老南京先生善於奉養膳羞
藥物無不順適其意扁其軒曰蒲朮張學士士謙記之
正統癸亥菊隱歿反葬母塋毀瘠彌甚平居惟務教子
俾人治一經書聲琅琅不絕後奉詔優老以長子代一
日得疾神色不亂瀕殆索湯沐浴浴罷服深衣就寢奄
然而逝可以見其所養矣先生諱愷字仲和姓陳氏別
號艾菴世家考亭宋有曰升之者相裕陵封秀國公謚

成肅弟申之昭化軍節度使子澤補京秩以言青苗謫官
四明子孫因家焉曾祖澣元四明驛丞祖杞考伯俊號
菊隱以名醫徵詣京故今為金陵人母韋氏娶張氏繼
孟氏二馮氏子男三長鍾娶梁氏太醫院士克紹世業
次錮娶金氏乙酉貢士次鏡娶丘氏壬午貢士科第聯
芳時人榮之女一適貢士高敬皆張出女二適夏官鍾
郎中子宏士人杜原慶皆馮出孫男四淮濟清洛孫女
四幼先生壽七十有九生於洪武庚午七月六日卒於

成化戊子三月二十九日以其年某月日葬某原鍾等奉金太守伯玉所具事行謁予為銘予雖不識先生而聞其為清雅博行之士且其子皆以明經舉於鄉將成進士躋於顯榮足知其家教之有方矣銘何辭銘曰

猗嗟艾菴行脩而業專猗嗟艾菴遇異人而得異傳故其醫之良也藥無不愈而懷仁遠利世重其賢諸子詵詵承家擢第所以衍遺澤而迓恩封者固可待矣尚奚憾焉

牧菴先生墓誌銘

牧菴先生諱景字克企牧菴其號也以成化五年秋七月二十三日卒其孤以是年某月日葬于江寧安德鄉麻兒村祖塋以謙居連里巷於先生有平昔之雅請司訓方君元服狀其世系行實來乞著銘于其墓謙家食時嘗辱先生知愛去仕於朝懷德不忘近者歸休而先生以七十獲升賓筵賦言為壽方幸往還接笑談而薰道德豈意遽捐館哉先生之銘宜得名筆顧予言曷足

為先生重然其孤請之勤元服之迷覈而信謙於先生之德為所素知尚安忍辭乃按狀為序而銘之叙曰先生姓嚴氏世為姑蘇人曾祖亨甫隱德弗曜妣潘氏祖道通處士以醫業起家徙居金陵妣顧氏父尚節先生傳家學以名醫召為太醫院士擢梁府良醫妣沈氏先生資性過人好學不倦通周易嘗習舉子業有志用世竟以攻醫而止讀書不數遍輒能記至老不忘於素難靈樞傷寒諸書對客談及了辨如響故其醫為精永樂

中朝廷詔太醫院選名醫子弟讀書以備用命趙友同
吳敏德二先生教之先生方弱冠在選中得於授受益
探聞與二先生獨愛之曰是子不羣他日必以儒醫鳴
也後先生果以儒醫鳴都城求治者衆先生不避寒暑
不問富貧皆往治輒取神效於是擅名大方學者皆裹
糧來從先生悉以所學授之學成不忍舍去先生為人
氣岸高狷介方直不從俗取容每歲春暮人家多掃壠
先生祖壠未登有來召者皆不赴其動必以禮若此平

居讀書手不釋卷喜吟咏嘗學詩於雲間許士深先生
得其法凡有所作援筆立就語意清粹膾炙人口學士
周公功叙結詩社於金陵先生預焉詩筒酬唱多出人
意表同社敬服喜賓友至則命子具壺觴為樂尤能賙
卹匱乏愛好人倫兄弟四人兄克昭先卒拊其孤踰已
子與弟克勉克明友愛彌篤有以族衆求分者貲財任
其所取一無所問曰非吾志也晚剏一室扁曰頤老左
圖右史日玩索其中或經旬不出克勉新居市橋西不

半里許時時一往情話而返去年忽邁痰喘疾劇而平者再今秋復作先生度不可起遂戒家人治後事果卒享年七十有三生於洪武丁丑九月二十二日配陸氏有懿行先四年卒子男二曰縉善幹蠱綸勤問學皆賢而克家女二嫁同郡顧旻趙驥孫男三俱幼嗚呼自世教衰士之敦古道者鮮矣波頹風靡之餘有如牧菴行誼志節屹若砥柱特立於世豈非古之遺民也歟銘曰東漢風節陵寔啓之高尚其事惟後之儀猗嗟牧菴世

承令德抗志物表先民是則早肆于學博極羣書醫精
理明由師碩儒儒者於醫存心利濟名燧有聞學徒雲
詣素蘊之發一寓於詩居家友愛伯壘仲簾制行端方
高潔自守樹德務滋休儲厥後麻田之原有封若堂過
者其式君子之歲

進階亞中大夫荊州知府張公墓誌銘

公諱崑字廷瞻姓張氏其先君灌州宋仁宗時國子丞
叔完徙青州五世孫贈太常丞泰來又徙汴太常子至

儀扈從南遷始居上虞今為上虞人至儀十一世孫與
賢迪功郎奉化丞與賢生原道原道生九功宜春教諭
宜春生孝先則公之父也以公貴封當塗知縣母俞氏
公幼從宜春府君學性資穎異志復懇篤學大有成遂
以詩經中永樂癸酉鄉試登春官貳榜授寧國宣城教
諭九載秩滿以少師楊公薦知太平當塗縣攝廣德州
事秩滿以績最賜勅封父如公官母妻皆孺人時太平
寧國徽州三郡交章保公知府事不許擢公南京雲南

道監察御史未二載陞鎮江知府又三載丁當塗府君憂去官服將闋陞公知泉州命賁憑與之未幾又改荊州三郡通歷九載當滿考去公亦上疏請老官民連疏保留詔增秩三品還公於荊尋念母老復以疾謝事不許乃援詔書例竟棄官歸歸四年卒成化四年七月二十三日也享年七十生於洪武某月日公在宣城以師道自任色嚴而氣和望之可畏即之可親立教條嚴課試誨人不倦指授為文皆有典則士多成就登名甲科

槐文僖集

役分具芻糧別以旗號迎犒江上將士咸悅有軍士掠民牛畜以去公陳于靖遠即斬以徇諸軍肅然民賴以安在內臺不事苛察務持憲體嘗監操京衛軍馬督察城禁劾其將官弛縱軍令以振有婦人被誣謀殺親夫繫獄十八年不能決公訊知其枉即奏出之在鎮江以地隣當塗民素知公比至抑強扶弱勤於拊字遠近悅服在泉州俗多狙詐頗尚威嚴州有大道衆惑於怪廢阻不由公即闢而通行仍植樹以蔭過客士大夫服公

識正作詩頌之有市河久塞前守以役巨憚為公設法
浚之遂通舟楫毀尼僧菴百餘區改為社學延師教民
子弟尼僧悉勒歸嫁郡有土豪糾結肆虐鄉邑莫敢誰
何藩臬亦不能制布政石公屬公治之公親書一票遣
卒召之曰來則良民不來且有罪豪曰此公忠信廉潔
不可犯也即赴府見公諭令改過許其自新遂稍戢斂
既而石公至索其人公復召之豪見石公大悔曰我以
公召故來若石布政何來也石公以其罪惡深重終為

後患卒命公杖殺之鄉民戴香路側豪黨潛走京師奏
公上命法司遣官詣泉體勘事皆無染抵豪黨罪移置
口北在荊州郡王府下人多出擾民公以正繩之無敢
恣肆公剛毅有守歷官三十餘年未嘗營產業才高識
遠治劇有餘所至以興學為務太平當塗二學頽毀公
為新之鎮江學僻居委巷公奏遷之在荊泉亦然政暇
詣學講析經書督厲諸生尤盡心刑辟詳於訊察務在
得情獄無冤滯持身廉潔一塵不滓退則靜處一室焚

香觀書蕭然若物外人為文古雅詩尤清逸字法歐虞
時應人求舉筆立就爭寶傳之配趙氏有婦德生一子
一女子曰玠女嫁會稽章懌側室某氏生子璫馬氏生
子某孫男二洙泗孫女一曾孫女一以卒之明年十月
葬官樣山原玠走京師奉山東布政使葉公冕所述公
之行實乞予為銘予於公素所知識銘尚何辭遂取所
述叙次之畀之以銘銘曰

君子之志行道濟時苟得其位大布厥施於惟張公道

明學邃所養既充用無不備橫經師席士類以興作宰
近甸熒然政聲入陟都臺憲綱以立曰范曰張邦之司
直出典大邦所至愛人曰召曰杜有脚之春居有異績
去有遺愛永鑑玉壺名聞中外方究厥用俾贊化機去
就明決浩然言歸今之名臣古之循吏功德在人懷思
罔替公則逝矣有不逝存流慶之遠貽于子孫

倪文僖集卷二十八